

صراع ذاتي

ديوان شعر بالعامية



صراع ذاتي

ديوان شعر بالعامية

عصام رمضان





اسم العمل : صراع ذاتي

اسم المؤلف و دولته : عصام رمضان - مصر

تصنيف العمل الأدبي : ديوان شعر بالعامية

الترقيم الدولي : 2 - 6 - 85455 - 977 - 978

رقم الايداع : 3104 / 2019

رقم الطبعة : الأولى

تصميم الغلاف : محمد وجيه

تدقيق لغوي : نجاح العالم السرطاوي

الناشر : دار ديوان العرب للنشر و التوزيع - مصر - بورسعيد

المدير العام : محمد وجيه

تليفون : 00201211132879

الموقع الرسمي للدار : www.dewanelarab.com

إهداء

إلى كلّ من تتوق نفوسهم إلى حروفٍ تُشيع،
وإلى كلماتٍ تُفريح وتُوجع
أهديكم بعض الرسائل والسّياط

عصام رمضان

صباح الخير

صباح الفُل ياهل الدَّار
وربي حارسكوم الأشرار
ولأجل عيونه ما تَطُولنا
بنكتب شعر بالمندار
ونتبخَّر بجأوا وعُود
ونحرق قلب كل حسود
حروفنا على الديابة أسود
تدخَّلهم جحور الفار
يا رب رباطنا فيك يقوى
ويبقى على الصراط تقوى
يكون لنا حُجَّة للجنة
يحرم عن عينينا النَّار

كلّ عام

كل عام وأنتم بخير
أهل برو أهل خير
ربنا يديم المودة
بين قلوبكم زي الطير
ربنا يعودها عليكم
تبقى كل الدنيا ليكم
والهنا ماسكاه إيديكم
والسنين الجاية غير
والحياة تفرد ذراعها
حلمكو يطيب وجعها
تشتري كل الي باعها
تبقى ليكو خط سير
تمشوا للجنة ونعيمها
مسكها تشمو ونسيمها
الحياة الحق يومها
يوم م يصرخ للنفير

على باب السفير

وجهزت الورق بدري
شهادة إني مش ميت
برغم إني يا ناس ميت
وصابني الدور!
وهو الموت ميتعدش
بغيرش قبور؟!
على كلِّ
أخذت من الورق.
أسباب
دا غير تطعيم عشان
ماعرفش إيش عدوى
بنعمل ليها ألف حساب
وقولت وماله ميضرش
لو إن الجتة مش مطمع
لأني ملاريا أولذباب

دا حتى الجلد متكرمش
ونص العضم رق وداب
لكن بردو وقبل العتمة
مـ تفتَّح
ولاجلْ مـ ألتقي بين الرجل
مطرح
فمن بدري على أعتابهم
حجزت الدور
وچاني ذهول!!
وچاني ذهول لكل مـ ألتقي
بين الأمل زهرة
على وشوش إلی من قبلي
چفاها ذبول
لحد الدور وصل عندي
كأن السيف على زندي
كفاني مثل ما غطّی
إلي من قبلي
فقلب الزهرة اتقصّف

وعود الجذع صابه خمول
فقلت الفطنة شيء طيب
وهماً أصلهم أهلي
لعلّي في السمار
ألقي عقود من نور
ندهت عليه...
ندهت عليه: (أيابن النيل)
عليك الله تهوّن مرة
ع الشيبة
وسيبك ما الجفا والجور
لقيته بص واتنهد
وحط ذراعه ع المرقد
وقالي يا زول
وقالي يا (زول): أنا منك
ولو أقدر أشيل عنك
ولا أجعل ما بيننا
شي كالمعبر
ولا أختام هت حكمنا

ولا دستور
لكن هي الظروف الخارجة
عن أمري
برغم إني قضيت التلت
من عمري على أرضك
مشيت و(قريت) جدا الأزهر
وبأيديكم خرجت من
الضلام للنور
لكن هي تقول قوانين
ورُدُّوها على الحدين
ويكفيننا وإياكم عَوَج سلاطين
وقالوا زي مـ بيطلب ورق منّا
ضروري نوقفك ف طابور
ونطلب منك الممكن ..
ومش ممكن
كأنه سحر جواني ولازمه بخور
يأهل الله وأنا مالي!
أنا بجري على حالي

لا عمري كنت ع الخارطة

ولا ع الكتف كات شرطة

ولا دبور

سيبونا واحنا نتصرف

مع ناسنا

هنبني حلمنا بإيدهم

وتزرع أرضهم فاسنا

ولا يلزمنا شي منكم

دا حتى الحلم لو حوّد

على بالكم

قولوا له يغور...

وهو الحلم يستجري

يهوب مرة على راية

ف وسط قصور؟!!!

فقلت له تاني يابن النيل...

فقلت له تاني يابن النيل:

وأنا منك

ولو حطوا ما بيننا م الورق

مِية وَأَلْفِين سِور
قِلِوب الخِلِق تَتَلِاقِى فِى مَلِكِ اللّهِ
وَأَرْزَاقِ الْعِبَادِ أَمْرِهِ
كِتَابِ حَكَمِهِ الْإِلَهِ فِى عِلَافِهِ
هِيرِزْقِنَا وَلَوْ كُنَّا
كُنْمَلِ كَفِيفِ فِى وَسْطِ چِچُورِ
هِيرِزْقِنَا وَلَوْ كُنَّا
كُنْمَلِ كَفِيفِ فِى وَسْطِ چِچُورِ

خيط العنكبوت

منسوج يا خيط
العنكبوت
بين شقتين
واتكتفت م الخلف
واتربطت إيديني
لما انكسر سن القلم
ع المشنقة
والسبع أصبح تريقة
وبدون نايين
ظهرت رايات العلم
بيضا مسلّمة
مُستسلّمة
والجهل صار ظافر مُبين
والعلم خاضع مستكين

بداية

سألت عليك
قالولي لم حرفينه وكام صورة
وساب البيت
ومن يومها
حروف الجبر مأهورة وحالفة
تفارق المعني
ولا عاد حرف يسمعنا ولو
صوت القلم عَلَّيت
وحق القوس فتحنا
لبابه أوجاعنا
قفل دوغري على ضلوعنا
وقال شطبت من بدري
خلاص سكيت
يا عم ارجع
حروف المد كل يومين تمد

دراعها تلسعنا
تلسوعنا
تقول فاتي الي كان فارس
على القافية
وكان حارس
على حروفي وبالعافية
يصون البيت
سألت عليك

درويش

ظالم حيطان المندرة
شبت غناوي ونأورة
فين الصور
والعفش فينه من سنين
حالف تدوب عظمتينك
من سكات
من غير أهآت
مبقاش نصيب للود ف جتّة
مكرمشة
بيّت ليه من غير عشا
عمر النصيب ما هييجي
يلحس تحب رجلين البلاط
بطل تدور ع الفتات
وافتح إيديك الصبح
وادعي ربنا

بس الدعا لازمہ عمل
وحجارة تربط ع الحشا
بطل أمور الدروشة

ما اسمعش صوتك

ما اسمعش صوتك يا قلم
إوعاك تقول دي سنين عجاف
لا تقولي ثورة وملحمة
ولا حق شهدا ومكرمة
إنكب ف جرابك وخاف
أحسن ما تكتب آخرتك
أستيكة تمسح جرتك
وبيايدي اكسر عضمتك
ولا من سمع
ولا حد شاف

ساعة رضاعة

أما وضاعة
افرش توب الخزي بضاعة
قلع لبس
نتش هبش
علق ملو الكون بحكاوي
فوق شماعة
خزق عين الشمس الظاهرة
رقع توبها إن كانت طاهرة
خرج كل الناس ف مظاهرة
وسك عليهم غطا بلاّعة
هي الناس دي هتنفخ ريشها
شايل همها مية وعيشها
بيحبوك ناسها وحرافيشها
أمّا صحيح الناس طمّاعة

حَوَّجَ تَبَلَّ

سَبَّلَ حَبَلَّ

ما إِنْتِ الهوا والنطفة الطاهرة

وكل غصون الخوف طرَّاحة!

مات الحر وحبلت أرضه

فضَّوا بكَارة حلمه وعرضه

والكَلَّاف بقا صومه وفرضه

يدوس على سيده بكل وضاعة

وأدوا الحلم بعقد سِفاح

جَوَّزوا حُرَّة لمية سَفَّاح

والزغاريد بين عوا ونباح

والمأذون وشهوده جماعة

خلُّوا العَقَّة الطاهرة لعب

ولدت عبلة ميتين شيبوب

خسرت لون الطين والطوب

لجل عيون بتنز خلاعة

رضيت عبلة بلقمة تضرّها
لجل ترّي ضناها وحلمها
حرموا النبت من أمه وصدرها
بخلوا عليها بساعة رضاعة
أمّا وضاعة!!

جرجس صاحبي

أول مرة بفتش وسط حروفي واطوف
 عاوز كلمة يكون لي بياض قلبها مكشوف
 وأغلفها بحب وأعطر وشَّها نرجس
 أصل دا جرجس عيده الليلة فبص وشوف
 هنجنّي العبارات بالود ووصل الخير
 فهتطرح علاقاتنا الثُّور ويكفّي الغير
 عيدك فرحة تبل الريق وتضبط مُودنا
 ما أنت ف عيدنا بتسبق حتى الفيس ف الشير
 جرجس اسم بيكتب صدق فيظهر عادة
 غير متكلّف ولا كلماته حواجها زيادة
 أصل الكلمة الصادقة بتكسر لو جُدران
 ع الشريان بتفرّغ فيه أكسير وسعادة
 جينا نهنّي وربّي يديم أيامك فرحة
 ولعل الكلمات من قلبنا واضحة وشارحة
 أنت زرعت الحب ما بيننا وفضلك سابق
 مش بنسابق بس جمائلك سابقة وطارحة

كتب القلم

كتب القلم كلمتين
ع العدل والشورى
كسروه وصقوا العين
واحدة بقت عورة
وعدوه ولو يرجع
يكتب كلام يوجع
بعديها يبقى اتعمى
ورجلينه مكسورة

الجوازات

عقلي خلاص هيشت يا عالم
طار البُرج بقيت مجنون
م إلي بشوفه ويسمع إنَّه
ف الجوازات يحصل ويكون

*** آيه ***

شاب مؤدب خلَّص جامعة
بدأ الشغل وأهي الناس سامعة
سيرته كريمة وحَسَن السُّمعة
والمستقبل له مرهون
طلب القُرب وخبَّط بيتهم
لاجل ينول خُطبة كريمتهم
بالطلبات ردُّوه يا خيبتهم
عملوها سلعة وهو زبون

*** أَيْه ***

عقلي خلاص هِشت يا عالم
طار البُرج بقيت مجنون
م إلي بشوفه وبسمع إنّه
ف الجوازات يحصل ويكون

قَصّة كمان وحكاوي كثيرة
ياما شنبات على أجسام عيرة
تقلبه حنفي يا دوب تكشيرة
شورة الست خروف بقرون
خربت بيته جهاز فوق طاقته
كل النصح دا ليه ونطقته
عجّز بدري وشوفوا بطاقته
كل حياته شيكات وديون

أيه

عقلي خلاص هيشت يا عالم
طار البُرج بقيت مجنون
م إلي بشوفه وبسمع إنّه
ف الجوازات يحصل ويكون

وادي كمان بنت يا محلاها
عاوزة حيطان البيت ويّاها
أصل أبوها دا لوربّاها
تبقى قنوعة لبيتها تصون
عاملة يا ناس بنت بارم ديله
من طلباتها ياهووو وياويله
قطع الحبل ف شدّة حيله
مهر أمّها كان زيرو كانون

*** آيه ***

عقلي خلاص هيشت يا عالم
طار البُرج بقيت مجنون
م إلي بشوفه وبسمع إنه
ف الجوازات يحصل ويكون

لَمَّا بقينا بعيد عن ديننا
سينا بناتنا وسينا بنيانا
تركوا الفرض وهجروا السُّنة
بقت "اشمعنا" جواب كربون
نَقِّي لبنتك حد يصونها
تملى مسامعه ويبقى عيونها
عُمره ف يوم ما بكلمة يخونها
تلقى الود لديه مضمون

أيه

عقلي خلاص هيشت يا عالم
طار البُرج بقيت مجنون
م إلي بشوفه ويسمع إنّه
ف الجوازات يحصل ويكون

جائزة نوبل

شهادة وقيمة .. وجائزة عظيمة
لكل الي سَخَّرَ حياته... وكرَّسَ
ف كيميا وطب .. وفيزيا وأدب
وكل الي عمَّ سلامه .. وحرَّضَ
ولجل الوصولي .. ومن هَبَ دَب
نحاول نزوِّد فضيحتة ... نجرَّسُ
مرشح لجائزة أنه صابر و صلب
برغم أنه أعمى وأطرش وأخرس
ورغم أنه مش لاقى أكل ولا شرب
وبيته باعوه وببلاش يمكن أرخص
لكنَّهُ مُصَمَّم .. وله ألف قلب
وقادر يطبِّل .. وقادر يقرِّض

ماليشن ف الطبل

ماليش ف الطبل والهيصّة كما البلايص ..
فأحسن لك تفكّ الحبل عن حرفي .. متربطنيش
لأنّه مجّد شرّاني وزاهد في الحياة .. درویش
مبیططبش ع المایل ولا المایع ولا الهبّیش
بجاوب بس على الكلمة بمفعولها .. متسألنیش
ولو مرة شیطان الشعر حَضَرته .. فمتلومنیش

كنت أنا

كنت أنا المبدور تقاوي
كنت ليل سُهدك غناوي
أبقى عنتر والقناوي
لولقيت الريح يعارضك

ويا ما كثيرُ

قابلت من البشر أصناف
فمنهم مَنْ يهابُهُ الخوف
ومنهم مِنْ خياله يخاف
ومنهم دمعته عيرة
وناس بتعيش على الغيرة
وغيرهم مَنْ بيتخفى
على هيئة ملاك طواف
وتلقى في الجناح مخلب
وضحكُهُ ف أصلُهُ تكشيرة
لا مِنْ غدره لنا مهرب
وعنُّه تهرب الجيرة
ومنهم مَنْ قليل الحال
لكنَّ بنظرته يسعنا
ويفرد مِنْ جبينه شال
ويدبح مهجته طعمة

ومنهم مَن يأيده الخير
وحارم نفسه حتى الحاف
ومنهم مَن يحبُّ الطير
ومنهم مَن عينيه خُطَّاف
قلوب الخلق مليون لون
وفيه مِ النقاشف
دي حكمة ربنا ف الكون
لكل مِ البشر أوصاف

طافي لهيب الأحية

يا طافي لهيب الأحيّة ببرودك
ف وهمك حابسهم وقافل تابوتك
يا تفرد في بحر المودّة شراعك
يا تقفل ذراعك وكمل جمودك

خلاصن يا كبير

خلاص يا كبير م شطبنا
وتحت باطاطتنا طبطينا
على البلد الي رايحة بلاش
على خفاش
خنق عصفورة وغصبها
وعشش جوة حيط البيت
ووزع شوكة وسط الغيط
ولو تقلي هيطلعلك
في طاسة الزيت
دا لو فيه زيت !!!
ولو حنفية بتنقط
تلاقى صورته و غرابها
معلقم طعم لقمتنا
ولمتنا بقت ممنوع
ولو فكرنا نتجمع

يطلع لك ميتين موضوع
فأحسن لك لسان أخرس
وودن أصم أو ميت
وعين منصوبة على الفاضى
ولقمة تاكلها وتعيد
ما يمنعي كمان .. راضي
ولاة الأمر بالفكّة
متستخسرش وتكّنز
تقولي ناوي أزور مكّه
وتعملي حويط ولئيم
دا قبلك ياما كل برسيم
وكان ظنه فتح .. عكّة
وقبلنا كام عشق كرسي
و ثبت عرش أركانه
وبين الزور وأعوانه
رباط عنتر مع عبلة
فلو فكّرت تتفلسف
وتعملي المواطن سين

هتلقى الجيم كتب اسمك
وتتوارى ورا الزنازين
وصورتك جوة ع الحيطه
وتحتيها ده " الأبله "
ما تخرج منه غير وانت
على إيدينك صاحات بتدور
ورق وناي وغنوة زور
على السقفه مع الطبله
ففتح مخك المقفول
هتخرج م الضجر والضيق
ووسّع للكفيل بيتك
وسلّك لك سبيل وطريق
تفك الأزمه دلوقتي
بكاه رزمه تبل الريق
ويعني يا اخويا لوبعنا
مفكر يعني حقك زيق
هتسبح فيه وهتبلبط
وتلعب لعبة الميت على المية

وغَوَّاصَةٌ ومنسِيَّةٌ
وسمكةٌ عاملةٌ إنسيَّةٌ
وطفلٌ غريقٌ
يا رب الرحمة من عندك
واحفظ لي حدود أَرْضِي
وإلا قيامة الدنيا
تقوم لو حتى دلوقتي
ولا إني أبيع شرفي
وأمرط في التراب عرضي

حط يومه ..

حط يومه .. جنب أمسه
شد فوقهم مية رباط
قال يهَيِّص لجل ينسى
هم خلى حلمه شاط
طلعت الأحلام تصوت
والفرح أصبح عياط
بلع الأحلام بهمه
شد فوق بطنه القمط

ثورة جاية

ثورة جاية!

..... لأ خلاص

طول ما صوت الحق واطي

والعبيد للسلط تطايطي

يبقى ليه الحريهتف

لجل يخفيه الرصاص!

ثورة قامت ...

.....عورة بانث ...

والجميع مغصوب و ساكت

خاف يقول حتى " القصاص "

لأ خلاص!

..... مش خلاص

طول ما فيه أحرار م بيننا

يبقى صوت الحق عالي

ثورة رايحة .. ثورة جاية

ثورة ع الي يكون ضلالي
بكرة يبقى الحق ... ثورة
والهتاف يا رب ... ثورة
والتاريخ يكتبها .. "ثورة
للبلاد كانت خلاص "
كات م بين أنياب ديابة
ينهشوا قوت الغلبة
حولوا الأوطان لغابة
أبدعوا فيها التناص

صراع ذاتي

مفكّرتش ف يوم إني هكون مسجون

وف إيديا قيود وحديد

وزناتي برآح واسع

ميتين فدّان

..... وأكون سجّان

وف الإيد إلي مغلولة ورا القضبان

..... حُصان رهوان

م أنا إلي يتنصب له ميدان

لكن محبوس ومتكتّف ما بين جدران

وأنا الشُعلة إلي وسط البحر نار قايمة

.....بدون فايدة

أنا الزهرة إلي بتفتّح

لكن عودها هزيل دبلان

م أنا القاضي وأنا المسجون

أنا السجّان

أنا العابد أنا الزاهد
ومتواضعي بميَّة ورد
وحافر بير كمان صدقة
م أنا العارف لسنة وفرض
لكني عشقت رقَّاصة
ببانها ف يوم ما تعرف صد
توزع لحمها صدقة
على أيتها عين تتمد
أنا معايا إلي مش مع حد
لكن يقتلني إني أحس وسط الناس..
..... كأني مداس
ومتصان حتى يوم العيد
.... ف كيسه جديد
وبعد العيد يكون طاهر..
يصيبه من الوسخ أنجاس
ميفرقشي ف عُرف الناس
..... أنا المحتاس
أنا المحتاس ف دوَّامة

وزحمة وملحمة كبيرة
وناس تحييك بضحكتها
وناس على شكل تكشيرة
وحلم يدور على بالي
ما بين ختمين وتأشيرة
ونبض القلب يتمرط
على أعتاب إلي رافضاني
أنا منك ومش جاني
يا ربّ كل دي حيرة
أنا واخد قراري زمان
هعيش إنسان
..... وأموت إنسان
ولو حتى بنص لسان
لا عُمرِي ف يوم طلع صوتي على بابك
وصاينك حتى ف غيابك
ولو هتزيدي في آهاتي
ويفضل بالي متحيّر....
وجوّايا صراع ذاتي.

زنزانة

زنزانة واسعة بتحبس الميَّة
والموج حزين وأنا شايفه بعنيَّا
بطل يبوس الشمس ف المغرب
لأ وإلي أغرب كمان بطل ملاغية

أزمة جراج

أه لو مكنش رئيس جراجنا كُسري
فاهم وعارف كيف يسير الباصات
كُنّا بقينا للتكاسي نأورة
وبقينا ضحكة للسوزوكي ومسخرة
وحطّ علينا التورمايات
لكن ولاجل حكمته
اختر لنا
من نفسنا
أحسن رئيس
من فعلنا
يملك جراجنا وحلمنا
يطلع لفوّق
يرجع ورا
حسب الفتيس
خلي جراجنا كأنه جنة ربّنا

على أرضنا
خلى الباصات تشبه عروسة مزوقة
وهو العريس
خلى كريم يغيّر يَنْفُسِنَا مِنَّا
كان فوق دماغنا و عَمَّنَا
كات خدمته أغلى كثير من عندنا
أصبح رخيص
وكمان أوبر
دايما "مكشّر تسألُه مالِك
ورُدّه يكون " ماليش "
كل الي فات كان فيلم
مكتوب عندهم
كان حلمهم
مستني ينزل ع الأفيش

.....

"كريم، أوبر: هي شركات نقل خاصة"

الزّرع ماله

الزّرع ماله كدا خوَّخ ومال عُوده
والورد كُّله دِبل وربيعنا باخ مُوده
العيب على الي بدر تقاويه وشق الفحل
ولّا الي مُحه ضحل ساب زرعنا لدوده

يقوم يمشي

يقوم يمشي !! .. متحلمشي
دي تركة بس منسية من أصحابها
أخذها غصب لما الحرف يوم سابها
حروف العلة جات له تهز وتطبل
وتتكعبل في وسط حروف مخربها
ضروري نبني سور على
نقوي الحرف وأساسه
ونرفع حتى حرف الجر
لاجل نصون بقية ناسه
ولو حرف الألف كسل وقال همشي
تبات كل الحروف صاحية ولا تنامشي
.. متحلمشي

لا للإرهاب

لوف ليلة ضربت جامع
أو تفجّر يوم كنيسة
هتلاقينا صف واحد
ضد أفعال الكو الخسيسة
عُمر ما محمد ومينا
هيكونو لكم يوم فريسة
إنت فاكر لما منعوا أذان غزة
يومها حي على الصلاة جت م الكنيسة
إحنا أصلاً شعب واحد دم واحد
متحاولشي وكفاياك الأعيب خبيثة

يا أرض خصبة

يا أرض خصبة والفسيلة زفت
يا حلمنا المنقوع ف مية لفت
هون يا ربّ ع الغلابة وكن لهم
من همهم العضم داب ونشفت

أطفال الشوارع

لملي عيالك يا بلدي واحضنيهم
وازرعي بإيدك تقاوي العدل فيهم
قبل ما خيوط العناكب تحتويهم
وأنت يالي بتبني بيتك بالمسلح
ابني ف عيالك أهم كثير وأفلح
شجرة الحب الي وسط البيت هتطرح
عود مودة وعود حنان الخير ساقهم
لملي عيالك يا بلدي واحضنيهم
وانتي يا ست الحبايب شدي حيلك
مستحيل ابنك يكون من بطن غيرك
علميهم .. كبريهم . م الطفوله متحرميهم
عيشيهم سنهم ما تعقديهم
يبقوا أقوى م الزمن والي يعاديهم
لملي عيالك يا بلدي واحضنيهم
نفسنا ما نشوف ف يوم عيل ف شارع

ماشي سارح
والأسى ف عينيه مليهم
كل أحلامه انتهت والمهنة صايع
الديابة للديابة رموه .. الله يجازيهم
هتلاقيه ساكن جراج أو جوا جامع
يستخيم الزمن يداري فيهم
لملي عيالك يا بلدي واحضنيهم

حبل الضيق

لما حبل الضيق خلاص خنق الوريد
وأنت مُرغم تشتري القوت بالولد
تترك الأوطان وتهجّر شريد
تشتري من بين عيون الناس بلد

عرفات

زي هذا اليوم تمامًا
كنت بلبس توب طهارة
فوق جبين الشمس فارد
ضليّ لو عاوزين أماره
كات عروسة حور وشابة
لما قلبي طاف ولبي
حرّها دوغري استخبي
ساب لنا نورها البشارة

الزعر

الزعر لو مال غصونه
متلمش غير عإلي راوي
قصرت فيه ... لم تصونه
ترميها ليه ع التقاوي

الكلام الحز

قصيدة في الشعر المهمّل (دون حروف منقوطة)

مسموح صراح أهل الهوى

أما الكلام الحر

محروم ع العوام

لما الأثم كسر الرصاص

ومسح معالم الكلام

ساد اللثام

وحمل لهم كَمّ الكلام

حرصك وعهدك ع السلام

وركوع سلاحك للعدا

أصل الحرام

مَلَك العدو راسك

وداس

عِلْمَكَ وَعِلْمَكَ

له مداس

والحكم صار للعم سام

عشان عيونك

عشان عيونك أدوق المُر والصَّبَّار
وأشرب كاسات الجوى كمدمنين البار
بارت رايات الهوى والسوق جفاه تعويم
توعدي لي به بالنعيم وتسيني وسط النار

يعني إيه !!

يعني إيه ما اشغلشي بالي
وبعدك أنت حالي حال
وإن سهرت سنين خوالي
فكري يبقى داخ ومال
ياللي قلبي جوه منك
ضي عيني يبان .. في نك
صدقيني غصب عنك
بعدي عنك شيء .. محال

يعني إيه ما أحلمشي بيك
وأنت حلمي كل يوم
دعم باخده من ... عينيك
بيه بصد عتاب ولوم
ليه تحاولي تبعديني
وأنت ع الغربة مُعيني
ارحمي دموعي وأنيبي

ليه تزيدي في الهموم

يعني إيه بتقولي لي
وأنت بتزيدي البعاد
حد شاف الشمس طالعة
لما عم الليل سواد!
بّطي عندك كفاية
واخرجي للنور.. معايا
أو بلاها دي .. الحكاية
لو هتبديها بعناد

يعني إيه بتكوني غايبة
والعبير مالي المكان!
وألقي ضل لصورة سايبه
بصمة للصوت ف الودان
لو براح الكون ما ساعك
أو شريتي وغيري باعك
مدّي للأشواق ذراعك
هتلاقي ف حضني الأمان

مساء الخيز

مساء الخير على القشّة
إللي بتهز الجبل من فوق
فينزل ضلّه يتمخطر ويتمشّي
في عز الصّهد تلقى ضلوعه يتمطر
يعطر منها أحلامه ويلبس طوق
وبعد العصر يتوضى بقلب وعين
يصوم الاتنين ويستنى أذان الشوق

صديقي

لا عُمرِي ف يوم كتبت الشعر للسلطين
ولا بهجو بكلماتي
ف حد بعينه وبشخصه
أنا بكتب عشان فكرة
تخلد في التاريخ سيرتي
وبيها الناس هيتقصوا
ولجل عنيك وأخلاقك
أنا هكتب كلام محسوس
وهوصف بالقلم رسمك
وعلى خدك أحن وأبوس
وأغزل بالهنا طيفك
وأثوه في بحر إعجابك
أعوم وأغوص
وأخضرع الجبين زرعك
وتلقى دراعي مقداك

ولا مرة يميل فرعك
ما دام إيدي على كتافك
ما هو أنت الأخ والصاحب
وأنا خلّك.. وونّاسك

الأنا واخداه

واحد سـك الدنيا وراه
ريـح نفسـه وفات دنياه
بس ما قال من أي محطة
كنا ركبنا القـطـر معاه
حتى في دي بيخبي علينا
أما صحيح الأنا واخداه

كتفًا قلم

أما أنت فارس محترم
شارب فنون الحرب .. بل متشر به
بتدوس على زناد القصيدة وتضربه
في وشوش ديابة مجرمين .. فيبهر بوا
من بين خبايا النفس .. بتزيح الألم
يتهز بيك ساري العلم
ويهز فينا عز منا
من صغرنا فاهمين غلط
هنسيب حجارة عقلنا ونرمي الزلط
ونكسر الجهل الي عشش في البيوت
ونسك فوق منه التابوت
ونمد خيط العقل ونهد الصنم
مليون صنم
من صغرنا .. بيرگعوا لهم حلمنا
قفلوا بيان العلم سد ف وشنا

لكن كرمنا ربَّنَا ورفع الهمم
واتبدد الخوف والألم
وفهمنا إن الحلم بين ورقة وقلم
كتفًا قلم

حكاية أب

راح أحكي لك يا ولدي عشان
هتبقى قِصِّي وسيرتي
ساعة م اتعدّ م الأموات
ولما هيتنصب لي ميزان
تزيدني دعوتك رحمات
تطبّب كَفَّتِي العالِية
وترفعني هناك درجات
وهنقل لك
حكاية أب ربّاني
وخلاني أكون إنسان
وعارف يعني إيه إنسان
وم الأول
بداية قصتي كانت
في يوم م اختار
أبويا لبيته وعياله

عامود الدار
وجاب أمّي
وزين م اختار
بنوا وبنوني ويّا البيت
بطوبة جنبها طوبة
وفصلهم عرق ومرار
يغطيهم غزل وهزار
وكان يعرف حقوق الجار
وكان دايماً ك شُعلة نار
ينام وإيدينه شغاله
كترس يدور الآلة
بدون مواتير
وآسى كثير
وكان للناس براح واسيع
برغم إن الظروف بتضيق
وضلّه يرسم السكّة
ونوره كان دليل وطريق
وإيده رحمة ومودّة

وطوق لغريق
وعلمني
بأن البركة في اللمة
ومهما الإيد تكون لامة
ما تعرف وحدها تصفيق
ورغم إنه قليل الحال
لكن بابه في وش الضيف
ما يعرف يعني إيه أقفال
ولا جرب في يوم رزة
ولا أكرة ولا سلسال
كريم الطبع ع الفطرة
وزاهد في المتاع والمال
ولو عن حاله تستفسر
تلاقي رده تلقائي
"ف أحسن حال"
وكان ميخافش من بكرة
وأمله باني أكون فكرة
تخلد سيرته والدكري

وتتداول مدى الأجيال
يا رب دُعايا يوصل له
وترضى عليه وتغفر له
فرحمة ربنا الواسعة
هتغنيه عن دعا وسؤال

مساء الذوق

مساء الخير على أهل الأدب والذوق
مساء الحب متعطر بلهفة وشوق
مساء الوصل ع الصحة وع الجيرة
مسا صافي وصبح متعرفه الغيرة
وبسمة أصيلة مش زايقة ولا عيرة
تمد لشغرا إيديها وترفعنا معاها لفوق
مساكم ذوق

حرامي أشعاز

أنا قررت راح أسرق شعر
علشان أبقى يا ناس مشهور
كل الشعرا يجيبوا ف سيرتي
والنقّاد يقفوا لي طابور

ها

أنا قررت راح أسرق شعر
علشان أبقى يا ناس مشهور
كل الشعرا يجيبوا ف سيرتي
والنقّاد يقفوا لي طابور
مرة ف ندوة تكون لي قصيدة
ما أعرف مين خطّا ف سطور
حاول إنّه يأمن حرفه
رض كلامه وعلى السور
مش عارف إن أنا بتشكّل
مرّة تعالب .. مرّة صقور

ها

أنا قررت راح أسرق شعر
علشان أبقى يا ناس مشهور
كل الشعرا يجيبوا ف سيرتي
والنقّاد يقفوا لي طابور
أخطف بس الكلمة الحلوة
فصحى إن كانت أو لو غنوة
أصلي براضي جميع الشعرا
وكله هيبجي عليه الدُّور

ها

أنا قررت راح أسرق شعر
علشان أبقى يا ناس مشهور
كل الشعرا يجيبوا ف سيرتي
والنقّاد يقفوا لي طابور
طول م الفن ملوهش وزارة
تحميه من عفاريت الحارة
يبقى طبيعي أخذها شطارة
أختم فوق كلماتكو وأجور

ها

أنا قررت راح أسرق شعر
 علشان أبقى يا ناس مشهور
 كل الشعرا يجيبوا ف سيرتي
 والنقّاد يقفوا لي طابور
 بردو عشان بيهمني أمرك
 وف مصلحتي يطوّل عمرك
 بادعي وزارة الصحة تمّدك
 بالعلاجات لا الضغط يفور

ها

أنا قررت راح أسرق شعر
 علشان أبقى يا ناس مشهور
 كل الشعرا يجيبوا ف سيرتي
 والنقّاد يقفوا لي طابور
 هي حقيقتي ومش مكسوف
 بـ سرق من قصايدكو ألوف
 طول م الحارس بينكم نايم
 والرقابات شهادتهم زور

أنا قررت راح أسرق شعر
علشان أبقى يا ناس مشهور
كل الشعرا يجيبوا ف سيرتي
والنَّقاد يقفوا لي طابور

فكرتك

طبعًا هتوصل فكرتك رغم العقوق
رغم الورق رافض يطاوع جرتك
رغم الأسى ف سن القلم
رغم إن بينقط بدل حلمك ألم
رغم التعالب بين حروف الجر وأداة الندا
رغم الصدى
رغم الصدا حوالياك محاطوك والعدا
رغم إن نور الشمس باهت
والعلم ع الصاري ساكت
والكلام رافض يفوق
والعتمة مدت ظلها بين الشقوق

بيلوموا

بيلوموا وقالوا مفيش فايدة
دا لا عاد ييود ويتعايش
ولا رتّة باسمه ولا معايدة
ومصدّر لكل طـنايش
يا اخوتنا هـوايدة معاليكم
قطّعت السّـجاجيد رجليكم!
وأنا بعذر والحق عليكم
بتسيبوا شيطان ظنّكو طـايش
العـبرة يا ناس بقلوب واصلة
وظروف مانعة وحوارات حاصلة
دايمًا بتلوموا ودي خـصلة
على ميت والاسم دا عايش

الصبر

لتسهيل القراءة كل حرف (ق) كُتِبَ ج

....

جالولنا الصَّبر يا اخونَّا
ماجتش من كمان سنتين
ومن داج علجه ف المولد
مايفرجش معاه.. جلمين
وبعديها هنترسـتـج
لا بينا فجير ولا مفستك
وخيرنا ييجى وسطينا
وطرح بلدنا ف إيدينا
يكفينا ... يهنينا
بدال اليوم شهور وسنين
وماجتش من كمان سنتين !

....

فجلت وماله ..أَتَحَمَّل
وأفدي بروحي وبداري
وتلجوا رجابتي سَدَّاة
ويكفيني .. أَجَلٍ جَلِيل
أَصُومُ لجلن تشدوا الحيل
ونومتي ... جدر سَجَّاة
أنا أَتَحَمَّلُ عشان وَلَدي
تنام له بين حيطانها جفون
ويتنعم بخيـراتها
ويملك بيها كل الكون
ما يشعر يوم بأنه غَريب
ومتشَوِّج .. وكلُّه حنين..
وأديهم عُدُوم السنتين ...

....

وبعد ما عُدُوم السنتين
ما نيش جادر أجيم وسطي
وكل الخَلج مَخْـنُوجَة
وحوستهم نسخة من حوستي

ما جدرينش يجيبوا وكل لعيالهم
ولا علاجات لأبدانهم
ومات الحلم ع العتبة
جيل ما يدور ف أزهانهم
وعاودنا..

وفردة خف ف إيدنا
وعم حنين بيتمجّلت
علينا ويحكّي خيبتنا
وجالي .. "أصبر"
عشان الفردة يبجوا اتنين
ماجتش من كمان سنتين !!

....

خلاصة الجول
بلدنا بإيدنا نبنيها
نعمرها ونحييها
بهمة مش بأي كلام
وندعي ربي يحرسها
من الساسة وم الحكام

ويبجي الحُب وسطينا
وما يفرجنا غدر لئام
يا ربّ بلدنا ارعاها
واحفظها مدى الأيام

بحورُ الشعرِ

..... (مَفْتَح)

أنا الشاعر...

وليا ف كل ندوة سطور

ولا ف مرة أكون فاتر

ولا ف حربي أبان مغرور

وأحرك بالكلام شعرا

ونتناوش ونتساجل

ونتسلطن ونتشاكل

ونرسم بالصور فكرة

ونوضع حل لمشاكل

وتلقى ضلنا مسرور

ولو فكر يعكننا

ويخرجنا من الجنة

حقود ماكر...

هيلقى شِعْرنا سيفنا

على رقبته ... كما مسرور

(القصيدة)

....

بحور الشعر تغزّي دواويني
بجدّ بين " رجز " و " بسيط "
ف مركب له شراع " وافر "
وبيعافر دا أصله حويط
ولون الشمس ع المية
كجنّية
بتظهر مرة لعنياً
بترسم صورة بلاغية
وبعديها تبان شخايط
أقوم أجري عليه دُغري
وملقاش غير ف وشي الحيط
فبحر الشعر دا مخاوي
وبراوي ولسانه سليط
ونارف الحرف بتشعل
جناس أو سجع يتعلل
وقافية تشيط

وتلقاه مرة متنظم ومتساوي
ولحنه بسيط
رشيق حركاته كالحاوي
ورسمه نثيظ
وبجر الشعر ليه سحره وألوانه
وله شطين
وجواه بير
وأساراه ما تخرج برا من داره
ما عمره يخون
ويا ما كتير
كتم بين السطور نجوى
وأمل وأنين
ويا ما كتير
حمل مراسيل
لناس القلب يهواهم
ويمشيلهم خطي ومشاورير
يكحل قلبه لقياهم
وتسعد لو تشوفهم عين

وناس ملهمش غير صورة
ومحفورة
ما بين شطرين
فمش كل البحور مية
وغطس وعموم
ولا موجة وسحاب وغيوم
ومد وجذر طول اليوم
أنا بجري
أسير فكري وتنهيدي
ما أنا الشاعر
بتغزل بالورود إيدي
عقود رياحين
ويشهدلي الفراهيدي
وكلامي الزين
وأحس النبض ف عروقي
بحركة سكون
وعايش وسط كلماتي وبتنفس
نفس موزون

تفاعّل

مسير الوضع يتعدّل
وحالنا لغيره يتبدّل
مادمنا لحلمنا ماسكين
ومش سايبنها تتقنّدل

وبكرة الحلم هيصالحك
وأيام الهنا تصاحبك
ومُرقساوة الأيام
هتبقى بذكرها تضحك

هيّجي الحلم جري عليك
يقيد الدنيا من حواليك
وينسى الجرح عنوانك
وم الفرحة هيغمي عليك

رباعيات .. ولدي

ولدي نصحتك عَدِّي ع المية
متخافش من أنسي ولا حتى جنية
مد الايدين واعبر واركب خيالك حصان
ما انت البعيد انسان حسناته منسية

.....

ولدي نصحتك لما راح صوتي
كسر لجام اللسان هات غنوة لسكوتي
ارسم بيان الأمل وافتح ذراعك طريق
عيش طوق نجاه للغريق ..
خد عبرة من موتي

.....

ولدي نصحتك كثير اكتب عشان نفسك
خلي لحياتك دليل واعتبره بينافسك
للعلم تبقى علامة
وم الجهل هتكون كمامة
بالنور وفعل ابتسامة
على الوش زين رسمك

.....

ولدي نصحتك كثير
عَبِّي نصايح وشيل
فعل الحلال شيء جميل
خد منه واستكفى
لا تبص مرة لشمال
ولا تلخمكيش العيال
والصبر شيمة الجمال
وعن الحرام عَفَّة

.....

ولدي حكيث لك م الحكاوي كثير
ومن القصص 100 ومن الكتب اساطير
اقرا وحب القراءة وانسج حروفك معاني
اوعاك تكون مره جاني
عاوزك بريء زي طير

.....

ولدي رقيتك مسك
وم البخور كان عود
راسك ما بين الناس
عاليه لفوق والعود
ممدود وعزفك جميل
ع الناي كمان والعود
نسمع نقول الله
ماحلاه عبير العود

.....

ولدي نصحتك صل في الجامع
سيب الصلاة في البيت لما يكون مانع
اعبد وسبح كثير
ربك يفل العسير
داوم ذكاتك وصومك
ربك اليك سامع

....

ولدي نصحتك كثير
قوم شارك الشعرا
ثبت عينيك عندهم
خدم الأدب جرعة
أكثر عقول الناس
م المعرفة فارغة

.....

ولدي نصحتك والنصيحة أمان
ما تخافشي من أنسي ولا من جان
خلي تُكالك على الله
واطلب بطاعته رضاه
يغفر ذنوبك وتسكن
فردوس ف أعلى الجنان
ربك رحيم رحمن

.....

ولدي نصحتك والطريق بيّن
فكر ف نفسك قبل ما تعيّن
وانظر لعيبك وشوف
فعل الزمن والظروف
ستر العباد فرض عين
نورع الصراط بيّن

.....

ولدي نصحتك من وانت ف اللفة
لا تكون ف يوم رقاد
ولا غاوي للزفة
خليك مركز وراسي
بيتك لغيرك مراسي
كرمك هيملك قلوبهم
ولا تعرفكشي المعاصي

.....

ولدي نصحتك تكون
حافظ حقوق الجار
ولا يمل ففكرك ظنون
أصل الشيطان أمار
وع الضعيف كن حنون
صاحب من الأخيار
تلقى الرضا ملك ايدك
ولا ف الظنون تحتار

....

ولدي نصحتك تكون
ليّن ومش مايع
وشديد وقلبك حديد
صلب وقوي مطاوع
وحنين بدون تزييف
وعلى القسى مانع
للحلم خليك أسير
زين الخصال رافع

.....

ولدي نصحتك قوم واعدل الدفة
تقل بايدك ميزانك كفته خفة
ارفع دعاك للأله
اطلب سماحه ورضاه
ربك يجود خير عليك
حسناته لك أوفى

خلاصة القول

خلاصة القول

ديابة وغول

قلم مسموم

وبرّاية

وقاضي شمال

وشال وعقال

وسيف مسلول

ولهاية

وبيع يا عويل

وطف الكيل

مدام لك ديل

بلا نهاية

محتويات الكتاب	
4	الإهداء
5	صباح الخير
6	كل عام
7	على باب السفير
13	خيط العنكبوت
14	بداية
16	درويش
18	ما أسمعش صوت
19	ساعة روضة
22	جرجس صاحبي
23	كتب القلم

24	الجوازات
29	جائزة نوبل
30	ماليش في الطبل
31	كنت أنا
32	وياما كثير
34	طافي لهيب الأجرة
35	خلاص ياكبير
39	حط يومه
40	ثورة جاية
42	صراع ذاتي
45	زنزانة
46	ازمة جراح

48	الزّرع ماله
49	يقوم يمشي
50	لا للإرهاب
51	يا ارض خصبة
52	أطفال الشوارع
54	حبل الضيق
55	عرفات
56	الزّرع
57	الكلام الحر
58	عشان عيونك
59	يعني إيه
61	مساء الخير

62	صديقي
64	الأنا واحداه
65	كتفا قلم
67	حكاية أب
71	مساء الذوق
72	حرامي أشعار
76	فكرتك
77	بيلموا
78	الصبر
82	بحور الشعر
86	تفاعل
87	رباعيات ولدي

94	خلاصة القول
95	محتويات الديوان

تم بحمد الله

جميع حقوق النشر الورقي و الإلكتروني محفوظة للناسر

